



Nunatta imartaani angalasut tamarmik EPIRB-mik, piumasaqaatitut, peqalernissaat anguniarlugu Naalakkersuisut naalagaaffimmut saaffiginnissuteqarnissaat pillugu Inatsisartut aalajangiifigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

(Siullermeerneqarnera)

Qujanaq Inatsisartunut ilaasortaq Doris Jakobsen Jensen siunnersuuteqarninnut.

Demokraatit paasisinnaavaat siunnersuutip siunertai. Qularutiginngilara, tamatta attortittartugut, takugaangatsigu, imaani ujarlertoqartoq, qularutiginngilaralu, tamatta neriuttartugut, ujarneqartut ajoratik nanineqarnissaannik.

Isumaqaatigaarput, ujaasinerit ajornannginnerullutillu sunniuteqarluarnerussasut malittarisassa qarutta, angallatit tamarmik ajutuulernermi nassitsissummik EPIRB-mik peqarpata. Taamaattorli qularutigaarput Siumumiit siunnersuut. Ilumut kissaatigaarput nunatsinni aalisartortagut immikkut aningaasartuuteqassasut 10.000 korusuunngajannik maannakkut inissisimanerminni, tassami aalisartut orsussamut ulluinnarnilu nioqqutissanut aningaasartuutaat qaffassimapput Naalakkersuisut, Siumup akuuffigisaanik politikikkut ingerlatsinerata kingunerisaanik? Ilumut Siumut isumaqarpa, maannakkut piffissaasoq aalisartut kaasarfiannit aningaasanik aalleqqinnissaq? Uagut Demokraatinit taama isumaqanngilagut.

Imatut siunnersuuteqarnermi allaanngilaq aalisartut tamaasa ajutoornissamut sillimasernissaannik piumaffigineqartut. Ajutoornissamut sillimmat isumassarsiatsialaavoq, kisiannili tamanna uagut politikkerit aalajangissanngilarput. Tamakku inuit ataasiakkaat namminneq aalajangigassaraat. Taamaapportaaq EPIRB-mut tunngatillugu. Tamakkua, uagut politikkerit aalajangigassarinnngilagut. Tassani kiffaanngissuseq aalisartumut tunniuttariaqarparput, namminneerlutik pineqartut aningaasartuutigerusunnerlugu aalajangissallugu.

Siunnersuutip siunertaa ilalersornarpoq, uagulli pinngitsaaliissummut peqataarusunngilagut, aalisartunut akisunerulertitsisussamut. Aalisartut kiffaanngissuseqarlutik namminneq aningaasaatimik sumut atornissaat aalajangissavaat, uagullu aalisartut aningaasartuutissaannik tuniorassanngilagut.

Taamatut oqaaseqaateqarluta siunnersuut itigartitassatut innersuussutigaarput.



DEMOKRAATIT
DEMOKRATERNE